



Vía da Prata

Etapa Cea-A Laxe

Esta etapa, de 33 km e dificultade media-alta, constitúe a transición entre a provincia de Ourense e a de Pontevedra, ascendendo gradualmente cara á Serra do Faro.

O tramo inicial lévanos a O Castro (Dozón), onde podemos atopar o Albergue de Peregrinos de Castro e a Igrexa de San Salvador, puntos de descanso e avituallamento. Esta localidade é coñecida pola súa Festa da Carne ao Caldeiro e Bola con Torresmos, un prato referente da cociña tradicional do Deza cuxa orixe reside nas feiras de gando.

Desde O Castro, iniciamos a subida ao Alto de Santo Domingo, un dos puntos mais elevados da ruta. Neste alto atopamos a ermida e o cruceiro de Santo Domingo, un lugar perfecto para gozar das vistas e facer unha parada antes de continuar o descenso por vías locais que nos levan ao concello de Lalín.

Na pequena aldea de Puxallos, na parroquia de Catasós coñecida pola súa fraga declarada monumento natural, atopamos a ermida e o cruceiro de San Roque, fermoso exemplo da arquitectura relixiosa popular da comarca.

A ruta segue cara Lalín, cruzando o río Asneiro e chegando a Donsión, onde se atopa a igrexa de San Pedro Fiz. Este templo foi fundado no século XVIII baixo o mecenado da familia dos Gil Taboada, cuxo poder era patente nos seus escudos heráldicos e sepulturas no interior.

A etapa conclúe en A Laxe, parroquia de Bendoiro, outro núcleo importante do camiño onde se atopa o albergue de peregrinos de A Laxe, un lugar de descanso para a seguinte xornada na que o trazado conflúe co Camiño de Inverno.

Etapa A Laxe-Outeiro

Esta etapa de confluencia de 2 camiños, a Vía da Prata e o Camiño de inverno ten 33 km e dificultade media e transcorre por estradas e camiños



tradicionais que nos permiten desfrutar da paisaxe do Deza e O Ulla. Desde A Laxe camiñamos ata Vilasoa para coller unha pista ata as aldeas de Prado e Borralla e avanzar polo camiño tradicional ata a ponte románica de Ponte Taboada, no río Deza, que separa Lalín de Silleda.

Ascendemos uns 5 km por camiño enlousado ata Taboada para seguir por Transfontao co pazo barroco e capela das familias Montenegro, Mosquera e Ojea. Chegamos a Silleda onde podemos descansar, mercar avituallamento, visitar a Igrexa neoclásica de Santa Eulalia ou mercar as rosquillas tradicionais.

Deixamos Silleda, pola senda de San Fiz, camiñando en lixeiro descenso ata a ponte medieval de Chapa, sobre o río Toxa, cunha fermosa paisaxe que nos acompaña ata Bandeira; vila que cada agosto celebra a Festa da Empanada, de interese turístico nacional.

Continuamos polo monumento a José Espiño, párroco local recoñecido pola gran labor a prol do camiño, para chegar ata Dornelas coa igrexa de San Martiño; exemplo sobresaínte do románico compostelán.

Avanzamos por camiños asfaltados á beira da estrada nacional 525 ata a parroquia de San Miguel de Castro, na Estrada, atopando a Capela das Angustias do século XVIII e a pouca distancia a ermida románica de San Miguel. Rematamos este tramo final visitando o miradoiro do Castro ou “Eira dos Mouros”, que nos despiden da provincia nun marco incomparable sobre o río Ulla.